

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA LAITI



FEPUARI - IUNI

2025

TUSI AOGA ASO SA VASEGA LAITI ~ 2025

FAASOLOGA O MATAUPU

<u>ASO/MASINA</u>	<u>MATAUPU</u>	<u>TUSI FAITAU</u>
1.Aso Sa – Fepuari 02,2025	O le ola fou i le agaga	Roma – 8:5 – 8
2.Aso Sa – Fepuari 09,2025	Talitonu ma Fa’aolaina ai	Galuega – 16:31 – 34
3.Aso Sa – Fepuari 16,2025	Tagata mauoa ma le tagata mativa	Luka – 16: 22 – 25
4.Aso Sa – Fepuari 23,2025	Mataupu Fa’amanatu o Fepuari	Fesili ma Tali
5.Aso Sa – Mati 02,2025	O le tagata tutuli toe leo o’olo	Mareko – 7: 31 – 37
6.Aso Sa – Mati 09,2025	Aua le fefe a ia Mata’u i Le Atua	
7.Aso Sa – Mati 16, 2025	E na’o Le Atua e silisili ese moni	Mareko – 10: 42 – 44
8.Aso Sa – Mati 23,2025	Liliu i Le Atua soifua	Galuega – 14: 8 – 17
9.Aso Sa – Mati 30, 2025	Mataupu Fa’amanatu o Mati	Fesili ma Tali
10.Aso Sa – Aperila 06,2025	O le tatalo a Iesu i lona Tama	Ioane – 17: 1 – 5
11. Aso Sa – Aperila 13,2025	O le Aso Sa o le Laupama	Mataio – 21: 7 – 11
12.Aso Sa – Aperila 20,2025	Ua toetu Iesu mai le oti ma le Tu’ugamau	Mareko – 16: 5 -6
13.Aso Sa – Aperila 27,2025	Mataupu Fa’amantua o Aperila	Fesili ma Tali
14.Aso Sa – Me 04, 2025	O le Atali’i na leiloa	Luka – 15: 17 – 24
15.Aso Sa – Me 11, 2025	E mafanafana le alofa o le Tinā (Aso Sa O Tinā)	Isaia – 66: 13
16.Aso Sa – Me 18,2025	O le foa’i a le fafine mativa	Mareko – 12: 41 – 42
17.Aso Sa – Me 25, 2025	Mataupu Faamanatu o Me	Fesili ma Tali
18.Aso Sa – Iuni 01, 2025	O le folafolaina mai o le Agaga Paia	Ioane – 14: 26
19.Aso Sa – Iuni 08, 2025	O le Aso Sa o le Penetekoso	Galuega – 2: 14 – 21
20.Aso Sa – Iuni 15,2025	O le Tamā alofa	Luka – 15: 20
21.Aso Sa – Iuni 22, 2025	Mataupu Faamanatu o Iuni	Fesili ma Tali

MANUIA GALUEGA O LENEI TAUSAGA

ASO SA – FEPUARI 02, 2025

MATAUPU: O LE OLA FOU I LE AGAGA

TUSI FAITAU: ROMA 8: 5-8

SINI: IA MALAMALAMA MA ILOA E TAMAITI O LE OLA I LE AGAGA PAIA, O LE FA'AILOGA O LE TAGATA UA ALU ESE MAI LE OLAGA TUAI MA LE AGASALA SA IAI.

FESOASOANI MO FAIAOGA:

Fa'atalofa ma fa'afeiloa'i atu ia outou susuga i faiaoga, Malo le sopo fa'afetai i le soifua manuia, Talitonu le manatu o lo'o manuia lava outou uma ile alofa o le Atua i lenei fo'i amataga o lenei tausaga fou, O le fa'amoemoe lava ma le amataga o aoga o lenei tausaga e taoto atu pea i lau susuga a le faiaoga mo le atoaga o lenei lava galuega mo fanau aoga aso sa, Tau ia ina ia i ai pea le Agaga o le Atua i lea fo'i itu o le galuega o lo'o tatou galulue ai, Fa'amoemoe pea i lau su'esu'e atili i le mataupu e faigofie ai ona malamalama i le mataupu.

SINA FESOASOANI MO LE MATAUPU:

O le fa'asoa a le Tusi Paia, i tagata lautele e mafai fo'i ona fa'apea o le fa'asoa mo i tatou fo'i auā ua a'oa'o mai le Tusi Paia mo le olaga e tatau mo le tagata fa'atuatua, O le apoapoa'iga a le aposetolo ia malamalama tamaiti i le uiga lelei o le ola e tatau mo le tagata kerisiano,

O le fa'atāua a Paulo e uiga i le ola i le tino ma le ola i le agaga, e lē fa'apea ua leaga le ola i le tino, ae lelei le ola i le agaga, e tāua fo'i le tino ma le agaga o le mea e tatau ona o fa'atasi, ia paleni i le olaga o le tagata.

O le feau o lo'o taumafai mai ai le Tusi Paia, o le eseesega o i'uga e maua e le tagata e fa'amamafa le ola i le tino, po'o le ola i lā le agaga. Manatua e lelei lava pe a malamalama i le tau i o ia olaga e lua pe a soifua ai le tagata. A fa'amamafa le tino e i'u i le oti, ae a fa'amamafa le agaga e i'u atu i le ola.

GALUEGA FAATINO:

1 – Ia fai ni fesili e atili malamalama ai le mataupu.

2 – Faitau manino le Tusi Paia i le vasega.

3 – Felafolafoa'i pea i ni manatu mai le vasega.

TAULOTO – ROMA 8:5 Auā o ē i lā lē tino e lotu atu i latou i mea a le tino, a o ē i lā lē Agaga e lotu atu i mea a le Agaga.

A'OA'OGA:

Ia ola paleni le soifuaga o le tino ma le agaga, Ia tutusa lou naunau i mea a le lalolagi e te maua, ma lou naunau e faitau le Tusi Paia ma tatalo i aso uma.

O le ola i le tino e gata mai i le lalolagi nei, a o le ola i le agaga e fa'avavau lea e lē gata mai.

PESE: Faitau le Tusi Paia ma tatalo i aso uma.

ASO SA – FEPUARI 9, 2025

MATAUPU: TALITONU MA FA’AOLAINA AI

TUSI FAITAU: GALUEGA 16: 31-34

SINI: IA ILOA E TAMAITI OLE TALITONU FA’AMAONI I LE ATUA E FA’AOLAINA AI LE TAGATA ATOA MA ISI.

FESOASOANI MO LE FAIAOGA:

Malo le onosa’i malo fo’i le fa’amalosi. E manatu o lo’o manuia pea le gasologa o le galuega. E manatu o lo’o maua pea le agaga o le galulue pea auā lava so tatou sao i le galuega tala’i a le Alii. Ia taumafai lava ia sailiili pea ma faitau manino le Tusi Paia ina ia faigofie ai le mataupu.

SINA FESOASOANI MO LE MATAUPU:

O le tala i le taimi na tu’uina ai Paulo ma Sila i le falepuipui, na latou pepese ma alalaga i le falepuipui. Na fa’afuase’i mai ona matala faitoto’a o le fale sa lokaina ai i lāua. O i fo’i na matata’u ai i latou o ē sa leoleoina i le fale puipui.

Na amata ai ona matata’u i lāua ma fefefe. Sa lāua fa’atoga ia Peteru ma Sila, i se mea e fa’aolaina ai lāua. Sa manatu leoleo o le Falepuipui ua lā fia faia se mea e oti ai lāua. Ma lāua fa’atoga atu ai ia Peteru ma Sila i se ala e fa’aolaina ai lāua.

O le tala lava ia, ua lē mafaia e le falepuipui ona taofia le talalelei ma lona mana aemaise ai le malosi o le fa’atuatua o ē sa tala’iina. Na liua nei tagata i le talaiga sa feagai ma Paulo ma Sila. Ua fa’aolaina i lāua atoa ai ma o lāua aiga. O le fa’atuatua ma talitonu i le Ali’i ma lana tala e lelei, ua fai ma ala ua fa’aolaina ai isi tagata.

GALUEGA FA’ATINO:

- 1– Fa’atāuaina pea le faitau a le fanau i le Tusi Paia
- 2– Ia fa’amalamalama upu o le faitauga.
- 3– Fai ni nai fesili e uiga i le mataupu.
- 4– Tu’u i ai le avanoa mo sa latou fesili.
- 5 – Fa’amanatu le tauloto o le Aso Sa ua te’a

A’OA’OGA:

- Ia tumau i le talitonu ma fa’atuatua i le Atua.
- Ia ola isi tagata ona o lo tatou fa’atuatua pea.
- Ia aua ne’i fefe e ta’u atu le mea moni.

PESE: A iai Iesu lo’u va’a oute ata i le Afā, With Christ in my vessel I can smile at the storm.

ASO SA – FEPUARI 16, 2025

MATAUPU: TAGATA MAUOA MA LE TAGATA MATIVA

TUSI FAITAU: LUKA 16: 22-25

SINI: IA ILOA E TAMAITI LE ESESEGA O TAUNUUGA O LE MAUOA MA LE TAGATA MATIVA ILE TALA, MO SE A’OA’OGA FAIGOFIE MO I LATOU.

FESOASOANI MO FAIAOGA:

E avatu pea le fa’amanatu i lau susuga e tusa o lā ta galuega fa’aauau pea mo fanau i lea Aso Sa ma lea Aso Sa. Ia maua pea le onosa’i ma le fa’apalepale. Ia tulei pea le faitauina o le tusi paia ina ia lelei le faitau.

SINA FESOASOANI MO LE MATAUPU:

O le tala ia Lasalo le tagata na lē amanaiaina e le tagata mauoa. O le i’uga na o’o ia Lasalo ina ua oti o ia, na taoto i le fatafata o Aperaamo. Ae talofa i le mauoa, na ia le maua se nofoaga lelei mo ia, aua sa ia le alofa i le tagata mativa. O le fa’ataoto na fa’amatala ai e Iesu le eseeseega o le tagata e tele ana mea ae leai se alofa. O le i’uga o le tagata mativa e leai ni ana mea, ae sa ia iloa lona tulaga vaivai sa i ai.

E le fa’apea e leaga le mauoa, leai e lelei fo’i le tagata e tele ana mea, pe afai e iloa ona alofa atu i ē matitiva. Sa fia maua mai se mea a lenei tagata mativa mai le mauoa, ae peita’i, na aiu lenei ali’i ma ia le avea i ai se mea ma ia. O le i’uga la o lenei tala, ua o’o ina o’o mai le oti, ona le maua lea e lenei alii mauoa se avanoa e sao atu ai i le lagi, a ua maua lelei le avanoa o le tagata mativa i le ola e fa’avavau.

GALUEGA FAATINO:

- 1 Manaia ae fa’atino le tala e nisi o le vasega.
- 2 Faitau fa’atasi le tusi paia ma le vasega,
- 3 Fa’aopopo i ai nai fesili e tusa o le tala.
- 4 Fa’amalamalama pea ni upu e le o malamalama ai le vasega.
- 5 Faamanatu le tauloto o lenei masina

A’OA’OGA:

- Ia maua le alofa i so’o se tagata.
- Aua le va’ai maualalo i isi.
- Ia maua le ola fa’asoa, i ē o lo’o mana’omia.

PESE: O Iesu o le manumalo, Jesus is the winner man.

ASO SA – FEPUARI 23, 2025

MATAUPU: MATAUPU FA'AMANATU O FEPUARI

Fa'afetai le onosai malo le taupati, i lenei fo'i masina malo le galulue malo fo'i le tauivi.

Toe fa'amatala ni vaega e lē o manino i tala e tolu o lenei masina pe afai e mana'omia e le vasega. Fa'amanatu tala o Aso Sa ua tuana'i.

SINA FESOASOANI MO LE MATAUPU:

Ia fai fesili i tamaiti, ia e fesilisili i ai, ae tali gutu mai latou. O nai fesili ia e fesili i ai e tusa o mataupu ua tuana'i.

FESILI MA TALI

1 – O le a le fa'ailoga e iloa ai le tagata ua ola i le Agaga Paia?

TALI – Ina ua alu ese mai le olaga tuai.

2 – O le a se a'oa'oga na maua mai i le mataupu o le ola fou i le agaga?

TALI – Ia paleni le fa'aletino ma le fa'aleagaga.

3 – O ai igoa o ē lea sa loka i le falepuipui?

TALI – O Paulo ma Sila.

4 – O le a le mea sa tupu i leoleo o le falepuipui?

TALI – Na fefefe ma matata'u ua fia fasioti i a'i lāua lava.

5 – O ai na faaolaina i le tala lea?

TALI – O leoleo o le falepuipui ma o lāua aiga na faaolaina um ai latou.

6 – O le a se aoaoga na maua mai i le tala ia Paulo ma Sila i le falepuipui?

TALI – Ia talitonu ma tumau le fa'atuatua i le Atua.

7 – O le tala ia Lasalo ma le mauoa, o le a se a'oa'oga na maua mai ai?

TALI – Aua le vaai maualalo i isi uso a tagata.

8 – Aisea na le sao ai le mauoa i le lagi e tusa o le tala?

TALI – E le'i maua e ia le alofa atu i le tagata mativa.

9 – O fea sa taunu'u i ai Lasalo, poo le tagata mativa ina ua oti o ia?

TALI – Sa taoto i le fatafata o Aperaamo.

FA'AOPOOPO ANE E LAU SUSUGA NISI FESILI E TUSA O MATAUPU O LENEI MASINA.

GALUEGA FA'ATINO:

Taoto atu pea i le faiaoga le fa'atinoga o le mataupu o lenei Aso Sa mulimuli o lenei masina

PESE: E lelei, E lelei, E lelei tele le Atua.

ASO SA – MATI 2, 2025

MATAUPU: O LE TAGATA TUTULI TOE LEO O'OLO

TUSI FAITAU: MAREKO 7: 31-37

SINI: IA ILOA E TAMAITI O IESU MA LONA MANA FA'AMALOLO NA TOE MALOSI LELEI AI LE TAGATA MA'I.

FESOASOANI MO FAIAOGA:

Talofa talofa lava, taeao manuia i le alofa o le Atua. Manatu o lo'o fapea fo'i lau susuga o lo'o manuia i le alofa o le Atua. Ia maua pea le Agaga o le Atua, e ala i le faitauina pea o le Tusi Paia, e faigofie ai pea le mataupu ma malamalama gōfie ai.

SINA FESOASOANI MO LE MATAUPU:

O le galuega fa'aola a Iesu, ma lana tala'iga, i le aai o Kalilaia. E tumutumu tagata ma le to'atele e lolofi ane ona o le ofoofogia o vavega na faia e Iesu i lana talalelei. Na fa'ateia lava le Ali'i, ina ua latou tu'uina ifo i le Ali'i le tamāloa, ua maua i le leo oōlo, ma le tutuli.

E le'i musu le Ali'i ae na ia faia loa i ai le galuega fesoasoani. Na tu'uina e Iesu ona tama'i lima i taliga o lē sā tutuli, ma ia feānu ma tago lona lima i lona laulaufaiva, ona matala ai lea o ona taliga ma tautala lelei ai le tamaloa ua manuia i le mana o le Ali'i.

I le tala lava ia, o le fa'aālia lea o le malosi ma le mana o Iesu e ola ai le tagata. A'o lea fo'i ua ia fa'aailoa i tagata sa lolofi ane iai, e malamalama ai fo'i latou i le mana o Iesu ma lana feau ile lalolagi.

GALUEGA FA'ATINO:

1. Fa'amalamalama ni nai upu e lē malamalama ai le fanau, pei o le upu lea EFATA – o lona uiga IA AVANOA.
2. Faitau manino le Tusi Paia
3. Fai ifo ni nai fesili ia atili malamalama ai
4. Fa'atāua pea le faitau

TAULOTO – MAREKO 7 : 34 EFATA, o lona uiga ia avanoa.

A’OA’OGA:

- Fa’atuatua pea ia Iesu ma talitonu i ai
 - E leai se mea faigata i le Ali’i
 - Saili fesoasoani ia Iesoga Aso Sa – FA’AUTA, FA’AUTA
-

ASO SA – MATI 9, 2025

MATAUPU: AUA LE FEFE A IA MATA’U I LE ATUA

TUSI FAITAU: LUKA 5 : 9 - 11

SINI: IA ILOA E TAMAITI E MANA’O IESU E FAI LE MEA LELEI, E ALA I LE MATA’U IA TE IA, AE AUA LE FEFE I TAGATA.

FESOASOANI MO FAIAOGA:

Malo le tauivi malo le onosa’i. O lo’o fa’asolo pea la tatou galuega faifai pea ae ia fa’atāua pea le faitau a tamaiti i le Tusi Paia ma malamalama ina ia latou tutupu ma ola ai i le lumana’i. O lau tapenaga lava e fua i ai le atoatoa o le galuega.

SINA FESOASOANI MO LE MATAUPU:

O le valaauina e Iesu o ona so’o, na ia valaau ai Peteru, ina ia tu’ua mea uma ae mulimuli atu ia te ia. Ua ofo tele le au so’o i mea ua faia e Iesu, a’o feagai ma lana galuega tala’i.

Na o’o ia Peteru le fefe ma le mata’u, ina ua nā iloa i luga o le sami le tele o i’a na maua ona o le mana o le Ali’i. O le i ai o Iesu i le faiva sa fai ua mafua ai ona tele ia na latou maua. O le valaau a le Alii o lona finagalo, e le toe fagot ai le sami m oni ia, ae o le a fagota ia maua tagata mo tala lelei a le Alii.

O le valaauina o Peteru ma isi soo, na valaau lava o loo feagai ma galuega masani. Na tuua mea uma ae mulimuli loa e tusa o le valaau mai. Na oo ia Peteru le fefe ae na ia alu loa e faia le manao o le Alii.

GALUEGA FA’ATINO:

- 1 – Manaia ae fa’atino e le vasega le tala.
- 2 – Fa’amamafa pea le faitauina o le Tusi Paia.
- 3 – Fa’asoa i nisi vaega ma fesilisili.
- 4 – Fa’amanino nai upu o le faitauga.
- 5 – faamanatu le tauloto o lenei masina.

A'OA'OGA:

- Aua le fefe e faasaga i le Alii
- Ia faasao le mea e tatau ona mulimuli ai.
- Vaai sao i le Alii, e manuia ai

PESE: – Ou te faia outou ma fai faiva i tagata

ASO SA – MATI 16, 2025

MATAUPU: E NA'O LE ATUA E SILISILI ESE LONA MONI

TUSI FAITAU: MAREKO 10: 42-44

SINI: IA ILOA E TAMAITI LE MANA'O O IESU I LE SILI MA LE MUAMUA, UA NA O LE ATUA LAVA E TOATASI.

FESOASOANI MO FAIAOGA:

Fa'atalofa atu i lau susuga i lenei taeao, malo le fa'apalepale malo foi i le filigā. O le fa'amoemoega lava ua taoto atu lava i lau susuga le tapenaga atoa, aemaise o lona fa'atinoia. Alo ane pea ma le fiafia e tusa o lo tatou valaauina i lenei galuega.

SINA FESOASOANI MO LE MATAUPU:

O a'oa'oga a le Ali'i ma lana fa'ata'ita'iga i le mea e tatau ma onomea ona soifua ai le tagata. O le ata na fai lava o ia ma faata'ita'iga sili, o le olaga o le tu'uina atu o le ola mo le olaga o le to'atele. O le nu'u o Isaraelu e fai a latou matai ma e tautua. O le ata masani lea o le olaga o le tu ma le aganu'u.

O le manatu o le Ali'i, o ia lava lea na ia afio mai lava ina ia aua ne'i fa'apea ona fai, O ia lava na manatu e sau e auauna atu i tagata, ae le auauna mai tagata ia te ia. O lona finagalo lava ia ola tagata uma ia te ia. O lana tautua ma le auauna atu ia ola tagata ia te ia. E lelei le ola tautua ae leaga pe a fia sili ma fia muamua. E faigofie a'oa'oga a le Alii, ae faigata ona olaina e tagata.

GALUEGA FAATINO:

- 1 – Faitau ia feauaua'i i le Tusi Paia.
- 2 – Vaai upu e lē o manino i le faitauga.
- 3 – Tuu se avanoa e tautala mai ai le vasega
- 4 – Fa'amatala le upu TAUTUA PO'O LE AUAUNA - i le galuega a matua o lo'o faia pea i aso uma lava.

A'OA'OGĀ:

- Aua le ola fia muamua a ia auauna muamua.
- Ia ola fiafia e auauna atu ma galulue mo isi.
- Ia aogā lo tatou ola e fesoasoani atu ai i le to'atele o tagata.

PESE: O le Atua e alofa ia te a'u, My God loves me.

ASO SA – MATI 23, 2024

MATAUPU: LILIU I LE ATUA SOIFUA

TUSI FAITAU: GALUEGA 14: 8-17

SINI: IA ILOA E TAMAITI LE TĀUA O LE LILIU I LE ATUA O LE OLA, NAI LO LE MULIMULI ATU I ISI TAGATA E LE ILOA LE ATUA.

FESOASOANI MO FAIAOGA:

Fa'afetai le taupati, malo le onosa'i. Ia tatou saili pea i le Atua, ma tatalo auā o ia lea e ana le feau, o lo'o tatou galulue ai e ala i le a'oa'oina o fanau. Ia mautu pea la ta auaunaga e ala i le faitauina pea o le Tusi Paia. Fa'amalolosi pea e tusa o lo tatou ofoina atu mo ia e tusa o lenei galuega.

SINA FESOASOANI MO LE MATAUPU:

O le tala ia Paulo, ma Panapa ma le tala'iga O le tala lelei na fa'asoaina atu e le au aposetolo i nu'u ese. O tala na fa'amaumauina e le tusi o Galuega, ma lona aogā i ō tatou fo'i olaga i nei aso.

Na o'o atu le tala'iga a Paulo ma Panapa, i le aai o Lusa ma iloa ai le tamaloa e lē o mafai ona savali ona o ona vae na fanau mai lava o faapenā. Na pulato'a i ai Paulo ma Sila auā ua naunau mai le tagata ma'i, e fia malolo ma fia savali. Na alaga le aposetolo ma fa'apea atu, ia tū luga ma savali auā ua iloa e Paulo ua ia te ia le fa'atuatua ma le talitonu i le Atua ma le tala lelei. Ua fa'aolaina lenei tagata, ae le'i iloa e le motu o tagata sa i ai, fa'apea lava latou ia, o se mana ma le malosi na maua mai i se isi atua ese, ae leai o le Atua soifua e ola ai tagata uma.

GALUEGA FAATINO:

- 1 – Ia faitau fa'atasi i le Tusi Paia
- 2 – Fa'amalamalama ni upu e lē o faigofie ona iloa.
- 3 – Fa'asoa ma le vasega ma fai i ai nai fesili.
- 4 – Fa'atino le tala pe a lava le taimi e fai ai.

A'OA'OGA:

- Ia sa'o le mea e fa'asaga i ai le olaga, ua na'o le Atua e fa'aolaina ai.
- Ia talitonu ma mautū le fa'atuatua i le Atua
- Aua le ola mulimuli i isi tagata, a ia na o le Atua lava.

PESE: Ua ou filifili mulimuli ia Iesu, I have decided to follow Jesus.

ASO SA – MATI 30, 2025

MATAUPU: MATAUPU FA'AMANATU O MATI

FESILI MA TALI:

FESOASOANI MO FAIAOGA:

Toe fa'amanatu nisi tala o lenei masina ia latou toe manatua ai.

Fa'aopoopo ane nisi fesili pe a e finagalo i ai.

FAATUMU LE AVANOA I UPU O LO'O MISI

GALUEGA 14 : 9 -10 Ua fa'alogo mai lenei tagata ia 1. _____ o lo'o tautala, ua pulato'a atu o ia ia te ia, ua iloa fo'i ua ia te ia le 2. _____ e malolo ai, ua fai atu ma le leo tele, ina tu sa'o ia ou vae i luga, ona oso lea o ia ma 3. _____.

1. Paulo 2. Fa'atuatua 3. Savali

ASO SA – APERILA 6, 2025

MATAUPU: O LE TATALO A IESU I LONA TAMĀ

TUSI FAITAU: IOANE 17: 1-5

SINI: IA A'OA'O TAMAITI I LE TAUA O LE TATALO I LE ATUA I TAIMI UMA MA ASO UMA. IA FA'ATAITAI MA FA'AMASANI I LE TATALO.

FESOASOANI MO FAIAOGA:

Fa'afetai le galulue, fa'amalo foi le finafinau pea i le galuega ua ta'uaogaina ai lo ta ola. E manatu o lo'o manuia pea lena itu o le galuega. Ia pipi'i lava i le Tusi Paia e mafai ona maua lelei ai le atoaga o le mataupu faatasi ai ma lau suesuega. Ia faatasi pea ma le Agaga o le Atua oe ma le lesona o lenei Aso Sa.

SINA FESOASOANI MO LE MATAUPU:

O le fa'asoa a le Ali'i ma lana a'oa'o mai pea i tu ma le amio e tatau ona ola ai le tagata e masani ma le Atua, po'o le tagata kerisiano. O le isi lea malosiaga na fa'aaogaina e Iesu i lana fo'i galuega fa'amisiona, o le saili e ala i le tatalo.

O lana masani lea e molimau i ai tusitala o le feagaiga fou, e mapu lava ma malolo le Ali'i, i se mea tu'ufua, pe a o'o ina mamafa tu le avega i faigata ma lavelave o le galuega tala'i. O lea fo'i e molimau i ai le tusi o lenei Aso Sa i le tusi a Ioane.

O lana tatalo tu'usa'o lava i lona Tamā, ona o le lē faigofie o loto o tagata, a o taumafai atu le Ali'i ia malamalama tagata ia te ia ma lana galuega fa'aola. O lona mana'o na ta'u atu i lona Tamā, ina ia alofa mai ma aumaia le mamalu ia te ia, ma ia tu'uina atu i tagata o le lalolagi. O lona finagalo ia iloa e le lalolagi o ia ma le Tamā e tasi i lāua, atoa ai ma le pule i mea uma lava atoa ai ma le tagata.

GALUEGA FAATINO:

- 1 – Faata'ita'i se tasi o le vasega e amataina le vasega i le tatalo.
- 2 – Fetufaa'i ma le vasega i le uiga o le tatalo.
- 3 – Ia mamafa lava le a'oa'oina o le faitau.
- 4 – Ia iloa lelei e le fanau so'o se Ītuaiga tatalo.

A'OA'OGA:

- Ia toaga e tatalo ma saili atu i le Atua i soo se mea tatou te manana oi ai.
- Ia tatou iloa ona faaleoina atu mea uma i le Atua e ala i le tatalo.
- Aua tatou te mumusu pe māasiasi e tatalo.

TAULOTO – OLE TATALO A LE ALII I LE FAASAMOA MA LE FAAPERETANIA

PESE: Read your bible, pray every day

ASO SA – APERILA 13, 2025

MATAUPU: O LE ASO SA O LE LAUPAMA

TUSI FAITAU: MATAIO 21: 1 - 11

SINI: IA ILOA E TAMAITI O LE ASO SA O LE LAUPAMA, O LE MALAGA A IESU I IERUSALEMA NA TI'ETI'E AI I LE ASINI.

FESOASOANI MO FAIAOGA:

Fa'afeiloai ma fa'atalofa i lenei Aso Sa i lau sususga a le faiaoga, malo lava le onosa'i i mea lelei ma le lagona e faia pea le mea sili mo le Atua ma lana tala lelei. Ia manatua pea lau

sauniuniga e tāua tele mo lenei galuega. Ia maua pea le Agaga o le Atua i lenei Aso Sa ma le a'oa'o atu o lenei mataupu.

SINA FESOASOANI MO LE MATAUPU:

O le malaga fa'atupu a le Ali'i o Iesu, i Ierusalem, na fa'ateia ai le nu'u ina ua vaai le asini o ti'eti'e atu ai Iesu. Na latou iloa lava o Iesu le tupu o tagata Iutaia ua afio atu. Na manatu le motu o tagata o ia o le perofeta mai le aai o Nasareta.

O lana malaga ua leva ona valoia mai e le au perofeta, o le a ia afio mai e fa'aola i lona lava nu'u. O lana misiona mo le lalolagi ia fa'aolaina. Ua ia tutuli i ona so'o ia aami i le asini o le tama'i asini ma lona tinā. O lana malaga ua ia fofou atu e ulufale i le aai o Ierusalem.

O le molimau a Mataio, na ia fa'aaogaina le tama'i asini mo lana malaga. O le fa'atali mai a tagata i lona o'o atu, na latou sala lau o pama ma folasia ai le ala na alu atu ai le asini, E le gata i lea ae na latou alalaga ma faapea ane, "Osana i le alo o Tavita, ia manuia le afio mai i le suafa o le Ali'i." O le talimalō a le nu'u ina ua ia malaga atu i le aai. O lana malaga e iloga ai le mamalu ma lona manumalo i le lalolagi.

GALUEGA FAATINO: UFA

- 1 – Fa'atino le tala e le vasega e atili malamalama ai
- 2 – Faitau manino le vasega i le tusi paia
- 3 – Fa'amanino ma fa'amalamalama upu o le faitauga
- 3 – Ia malosi e fesili i ai pe a uma ona fa'amatala le mataupu.
- 4 – Fa'amanatu le tauloto

A'OA'OGA:

- Ia ola fa'amaulalo le tagata e pei o le ituāiga malaga na malaga atu ai le Ali'i.
- Manatua pea le Ali'i fa'aola i taimi uma ole ola.
- Ia fa'afetaia le afio mai o le Ali'i ua tatou ola ai.

PESE: Osana pepese tamaiti uma, ua afio mai le tupu.

ASO SA – APERILA 20, 2025

MATAUPU: UA TOETU IESU MAI LE OTI MA LE TU'UGAMAU

TUSI FAITAU: MAREKO 16: 5-6

SINI: IA ILOA MA TAOFI MAU E TAMAITI O LE ASO SA LENEI NA TOE TU SOIFUA (OLA) A'E IESU NAI LE OTI MA LE TU'UGAMAU.

FESOASOANI MO FAIAOGA:

Fa'afetai le onosai fa'afetai le galulue. Atonu ua tatou toe tutu fa'atasi ane i le alofa o le Atua i lenei Aso Sa o le toetu i lenei taeao. Malo lava le onosa'i. O lenei aso fa'apitoa po'o le aso fa'ailogaina mo le au fa'atuatua, ia lafo atu pea i lau susuga lona fa'atinoina aua o le fatu atoa lea o la tatou fa'atuatua o le toe soifua mai o le Ali'i. Manuia tele le Aso Sa o le Eseta.

SINA FESOASOANI MO LE MATAUPU:

O le tala ma le molimau a le au faievagalia, e uiga i le mea sa tupu i lenei vaiaso. I le Aso Sa ua mavae, na malaga atu ai Iesu i lana malaga fa'atupu, ae peita'i na latou talia lelei lona o'o atu i le nu'u. Na latou alalaga ma fa'apea ane, "Osana i le alo o Tavita, ia manuia lē afio mai i le suafa o le Alii." Ua latou fola fo'i le ala i laupama ma ua latou alleluia ma fiafia tele i lona o'o atu.

O lenei vaiaso atoa, sa feagai ai Iesu ma ona puapuaga, e ta'ua o le vaiaso paia po'o le HOLY WEEK. Sa feagai o ia ma ona fa'amasinoga, ma latou fa'asatauro ai loa ia te ia. Na tu'uina ifo o ia i le tu'ugamau na foa i le papa.

A o lenei taeao, e tusa o le tala na faitauina mai ia Mareko, na ala usu atu fafine e to'atolu seia asia Iesu i le tu'ugamau, ma ave fūgālaau manogi mo ia. O se vaaiga uiga ese, auā sa latou ō ma le popole, po'o ai a fulieseina le ma'a o lo'o pupuni ai le gutu o le tu'ugamau. Ua avanoa le tu'ugamau ua ave ese le ma'a e le agelu ma ua mafai ai ona ulufale i totonu. Na latou vaaia le taule'ale'a o lo'o ofu i le ofu pa'epa'e talaloa, a ua leai se Iesu, ma ua ia faapea ane, "e le oinei o ia, a ua tu." E le'i mafai e le oti ma le tu'ugamau ona taofia Iesu mai lona toe tu a'e.

GALUEGA FAATINO:

- 1 – Fa'amatala manino pea le gasologa o lenei vaiaso paia
- 2 – Ia faitau fa'atasi nai fuaiupu o le faitauga o lenei aso
- 3 – Fai ni nai fesili e tusa o le mataupu
- 4 – O le ata o le toetu manaia ae fa'atino e le vasega

A'OA'OGA:

- Ia tatou fa'afetaia le Ali'i o Iesu na maliu ma ua toetu mai, ina ia tatou ola.
- Talitonu ma fa'atuatua pea i lona toe soifua mai
- Ia aoga lo tatou ola e maua ai le ola fiafia i nisi.

PESE: Jesus is the winner man.

ASO SA – APERILA 27, 2025

MATAUPU: MATAUPU FA'AMANATU O APERILA

FESILI MA TALI

1 – O le a le taua o le tatalo i le olaga o le tagata?

TALI – E faailoa atu ai i le Atua le mea e te mana oi ai.

2 – O ai na tatalo i ai Iesu?

TALI – Na tatalo o ia i lona Tama.

3 – O le a se aoaoga na maua ma ii le tatalo a le Alii?

TALI – Ia faamasani i le tatalo

4 – O le a le manu na tietie ai Iesu i Ierusalema?

TALI – Na ia tietie i le tamai asini.

5 – O le a le upu na alalaga ai tagata ina ua afio atu Iesu?

TALI – Osana i le alo o Tavita, ia manuia le afio mai i le suafa o le Alii

6 – O le a le feau mai le malaga faatupu a Iesu?

TALI – O le manumalo o le Alii, i le lalolagi, ma o lo tatou manumalo lava lea.

7 – O le a le feau o le toetu na tatou faamanatuina?

TALI – O le alofa o le Atua e le mafai ona taofia e le oti.

8 – O le a le mea e tatau ona tatou faia i lona toetu mai?

TALI – Ia tatou fa'afetaia le Atua ua tatou ola ai.

9 – O ai na fulieseina le maa sa pupuni ai le gutu o le tuugamau?

TALI – O le agelu mai le Atua

10 – O ai ulua'i misionare o le toetu mai o le Alii?

TALI – O fafine na latou asia le tuugamau i le taeao.

FESOASOANI MO FAIAOGA:

Fa'aopoopo ane nisi fesili o lenei Aso Sa e tusa ma mataupu o lenei masina

Toe fa'amanatu nai upu sa fa'amalamalama muamua.

Ia fa'asoa pea ma le vasega fa'alau'itele e uiga o le tusi paia.

PESE: E lelei e lelei e lelei tele le Atua

ASO SA - ME 4, 2025

MATAUPU: O LE ATALI'I NA LEILOA

TUSI FAITAU: LUKA 15: 17-24

SINI: IA ILOA E TAMAITI TUSA PE MATAGA LE AMIO A LE TAMA PO'O LE TEINE, E ALOFA PEA I AI LE ATUA.

FESOASOANI MO FAIAOGA:

E viia pea le alofa ma le agalelei o le Atua, e talitonu o lo'o manuia pea lau susuga a le faiaoga i lenei taeao. Malo le sopo malo fo'i le tauasa. Tatou tau fai fa'amalolosi pea auā lenei galuega o le a'oa'o atu o fanau. Ia fa'amamafa pea la tatou faitauina o le tusi paia e faigofie ai ona tatou malamalama i le lesona. Faifai malie pea le galuega o lenei taeao.

SINA FESOASOANI MO LE MATAUPU:

O le tala na fa'amatalaina, o le tala fa'a faatusa po'o le fa'ataoto a le Ali'i, e uiga i le tamaloa ma lana fanau e to'alua, ua mana'omia e le ui'i lona tofi o le oa. Na alu malaga ia i le nu'u mamao lava, ma le fiafia auā ua tele ana mea ua maua. Na so'ona ulavale ia ma ua i'u ina uma ana mea uma, ua ia ai fo'i i meaai a pua'a.

Ua ia lagona le salamō, ma ua ia fia fo'i atu i lona tamā. Na ia manatu ua fia ai ma ua ia le maua lava se mea e ola ai. Ua ia te ia le mafaufau poto, ua na o lona aiga e maua ai le fiafia moni. Ua ia toe fo'i atu, ma le loto salamō moni. Na iloa mamao mai o ia e lona tamā, ma ua ia momo'e mai ma fusi ia te ia. Ua talia lelei o ia e lona tamā ina ua ia toe fo'i mai. O le alofa fa'a tamā e tusa lava pe amio leaga sona atali'i, po'o sona afafine, e lē alu ese lona alofa moni i lana lava fanau.

GALUEGA FAATINO:

1 – Fa'atino le tala e nisi o le vasega ma atili malamalama ai i le tala

2 – Fa'amanino ni upu e le o malamalama ai le fanau.

3 – Fai ni fesili e tusa o le mataupu

4 – Fa'atāua pea le faitauina o le Tusi Paia

TAULOTO – LUKA 15 ; 24 Aua o lo'u atali'i lenei na oti, ua toe ola mai, na leiloa foi o ia, a ua maua

A'OA'OGA:

- Ia iloa ona fa'atoese i matua pe a tatou sese
- Ia lagonaina le salamo i se sese po o se fa'aletonu sa fai
- Aua le mana'o tele, a ia gata le mana'o i mea ua maua.

PESE:a le aoga Aso Sa – Fa'alogu ma usitai e le leai se isi ala.

ASO SA – ME 11, 2025

MATAUPU: E MAFANAFANA LE ALOFA FA'ATINA (ASO SA O TINA)

TUSI FAITAU: ISAIA 66:10 - 13

SINI: IA ILOA E TAMAITI OLE ALOFA O LE TINĀ E TAI PEI O LE ALOFA O LE ATUA.

FESOASOANI MO FAIAOGA:

Malo le folau taeao manuia i le alofa o le Atua. Ia maua pea e lau susuga le loto fiafia ma le naunau pea i le a'oa'oina o fanau a lo tatou ekalesia. Ia ta'iala pea le tusi paia ia tatou tapenaga e sagatonu ai ma maua ai se fa'amāmā avega. Alofagia pea e le Atua le alo atu i mataupu o lenei Aso Sa.

SINA FESOASOANI MO LE MATAUPU:

I le mataupu o lenei Aso Sa, o upu fa'amafanafana a le perofeta o Isaia, na ia tautala atu ai i le nu'u o Isaraelu. O le taimi ua mautu lē toe fo'i mai o le tafeaga mai Papelonía. O le ata o lo'o valivali atu e le perofeta, o le alofa lē mavae o le Atua i ona lava tagata.

O le Atua na te lē faitauina le leaga e faia e le tagata, ae e tumau pea lona alofa tunoa i tagata uma. O le fa'amanatu a le perofeta i le nu'u, e lē galo i le Atua ona tagata na filifilia. Na ia fa'atusaina le alofa o le Atua, e pei lava o le alofa o le tinā i lana lava tama. E fa'amafanafana e le tinā lana tama, ae fa'apenā fo'i le Atua ia, na te fa'amafanafanaina lona nuu. O le alofa o le Atua, e pei o le alofa o lo tatou tinā i ai tatou. Manuia tele le Aso Sa o tina.

GALUEGA FAATINO:

- 1 – Fa'amalamalama ni vaega o le tusi paia ana faitauina.
- 2 – Fai ni au fesili i le vasega
- 3 – Fa'amamafa le taua o le alofa faa tina.
- 4 – Fa'amanino pea le faitau a le fanau.
- 5 – Fa'amanatu le tauloto

A'OA'OGA:

- Ia tatou alolofa i o tatou tina
- Ia ola usiusita'i ia tina

PESE: O le aso lenei na fai e le Ali'i.

ASO SA: ME 18, 2025

MATAUPU: O LE FOA'I A LE FAFINE MATIVA

TUSI FAITAU: MAREKO 12: 41-42

SINI: IA ILOA E TAMAITI O LE FAI O LE FOA'I MO LE ATUA PO'O ISI TAGATA, E FAI I LE LOTO MALIE MA LE ALOFA E MONI

FESOASOANI MO LE FAIAOGA:

Malo le soifua manuia, ma le agalelei o le Atua, Fa'afetai tele mo le galuega faifai pea, ia fesoasoani pea le Agaga o le Atua i la tatou galuega fai fa'atasi. O lau susuga lava o lo'o taoto pea i ai le atoatoa ma le malamalama lelei o le mataupu. Ia maua pea le filemu ma le agalelei o le Atua i lenei Aso Sa.

FA'ASOA MO LE MATAUPU:

O le ata po ole vaega o le tusi na faitauina, o le feau a le Ali'i, ma lana fa'asoa, i le mea sa tupu, na matamata lelei Iesu i le nofoaga na gasolo atu ai tagata e lafo a latou tupe. O le tele o tagata, e mauoa o tagata e tele a latou mea ua maua. O tagata na latou lafo mea e tele i le mea e teu ai tupe, ae peita'i o le tasi fafine mativa, ua ia lafo ana mea uma sa ia te ia. O le fafine ua oti lana tane, ua ia lafo ma le loto malie. O le foa'i ua ave uma mea sa i ai, ua ofo atoa. O isi tagata ua ave isi mea, ae tu'u isi mea.

GALUEGA FA'ATINO:

- 1 – Fa'atino le tala ina ia latou iloa gofie ai le ata ma le feau o lo'o aumaia.
- 2 – Ia latou faitau faatasi i le tusi paia.
- 3 – Ia fai ni fesili e fa'alautele ai le mataupu.
- 4 – Fa'amanino lelei uiga o upu e le o malamalama ai.
- 5 – Fa'amanatu le tauloto.

A'OA'OGA:

- Ia fiafia e ola foa'i.
- Ia maua le ola alofa atu.
- Ia maua le loto malie ma le atoatoa e faia ai mea uma.

PESE: Le alofa o le Atua e ofoofogia

ASO SA: ME 25, 2025

MATAUPU: MATAUPU FA'AMANATU

FESILI MA TALI

1 – O le a le mea na tupu i le atali'i na leiloa?

TALI – Na i'u ina toe poto o ia ma toe fo'i mai i lona aiga

2 – Na talia lelei o ia e lona tamā ina ua toe fo'i mai pe leai?

TALI – Na mōmō'e atu lona tamā ma fusi ia te ia, ma toe talia o ia i le aiga

3 – O le a se a'oa'oga na maua ma ii le atalii na leiloa?

TALI – Ia iloa ona tatou salamo pe a sese

4- I le Aso Sa o tinā, o le a se feau na tatou maua mai ai?

TALI – Ia tatou ola usiusita'i i o tatou tinā

5– O ai e fa'atusa i ai le alofa fa'a tinā?

TALI – E fa'atusa i le alofa o le Atua

6 – O ai le tinā e sili ona tatou alolofa i ai?

TALI – E tatau ona sili lava lo tatou alolofa i ō tatou lava tina

7 – Aisea e sili ai le foa'i a le fafine mativa?

TALI – Auā sa ia foa'i ma le loto atoa mea uma sa ia te ia

8 – Ae ā le foa'i a tagata e tele a latou mea?

TALI – Sa latou foa'i e fua ia latou mea ua maua

9 – O le a se a'oa'oga e maua mai i le eseese o foa'i?

TALI – Ia foa'i mea uma ma le loto ua malie

FA'AOPOPO ANE NISI FESILI PE A LAVA LE TAIMI

PESE: This little light of mine, malamalama la'itititi oute fa'asusulu pea.

ASO SA: IUNI 1, 2025

MATAUPU: OLE FOLAFOLAINA MAI OLE AGAGA PAIA

TUSI PAIA: IOANE 14:26

SINI: IA ILOA E TAMAITI SA FOLAFOLAINA MAI E IESU LE AGAGA PAIA E MAUA E ONA SO'O MA TAGATA UMA.

FESOASOANI MO LE FAIAOGA:

E manatu o lo'o manuia pea lau susuga ma le galuega fa'a faiaoga. Malo lava le onosa'i malo fo'i le fa'apalepale, Ia mautu pea lau sauniuniga i mataupu ta'itasi, auā e manino ai ma lelei le lesona. Alofagia pea e le Atua le tapenaga o le mataupu.

FESOASOANI MO LE MATAUPU:

I le fuaiupu e 26 o le tusi a Ioane lea na faitauina, o upu taumavae a le Ali'i o Iesu na ia folafolaina mai ae le'i afio i le lagi. Ua ia fa'alaeiau i ona so'o ma ona tagata, auā e lē mafuta fa'atasi pea ma i latou. Ua ia ta'utino mai, e alu ia i le lagi, ae auina mai le fesoasoani i le au so'o ma ona lava tagata.

O lana fa'amafanafanaga ina ia aua ne'i popole pe fefefe lana fanau. Ua lata mai le ituaso e fa'amavae ai ma i latou, o le ala lea na ia faailoa mai ai le fesoasoani e sili ma aoga mo ona lava tagata. O lona Agaga Paia, e auina mai e taitai ma fa'atonutonu ia i latou i mea uma.

GALUEGA FAATINO:

- 1 – Ia latou manino i upu o le faitauga
- 2 – Fai ni fesili e atili ai ona malamalama.
- 3 – Fai se fa'ata'ita'iga e uiga i le upu FOLAFOLAGA
- 4 – Ia fa'asoa mai pea le vasega i ni o latou manatu.

A'OA'OGA:

- Ia talitonu ma fa'atuatua i le mea ua folafola mai
- Ia talia fiafia ma le agaga fa'afetai lo tatou fesoasoani sili.

PESE: The joy of the Lord is my strength

ASO SA: IUNI 8, 2025

MATAUPU: O LE ASO SA O LE PENETEKOSO

TUSI FAITAU: GALUEGA 2: 14-21

SINI: IA ILOA E TAMAITI O LE ISI LEA ASO SA TAUA I LE LOTU MA LE EKALEZIA, IA ILOA LE UIGA FAIGOFIE O LE PENETEKOSO.

FESOSOANI MO LE FAIAOGA:

Fa'amālo le onosa'i, fa'afetai i le galuega. E manatu o lea ua tatou taunu'u mai i le masina mulimuli o lenei fo'i vaiseuga o aoga Aso Sa. Ia lava saunia pea lau susuga mo lesona ta'itasi. E mana'omia pea le faitau malamalama i le tala mai le Tusi Paia, auā le matāupu mo le Aso Sa. Fa'amalolosi auā o loo silafaga pea le Atua i lo outou tautiga

FESOSOANI MO LE MATAUPU:

O le Aso Sa o le PENETEKOSO. O le aso lea na afio ifo ai le Agaga Paia i luga o le au so'o, ma faatumulia ai i latou i le mana mai luga. O le aso na taunu'u ai le folafolaga a Iesu e afio i le lagi ae auina mai lona Agaga Paia e fesoasoani i le galuega tala'i.

O le limasefulu aso lea, talu ona toetu mai le Ali'i o Iesu mai le oti ma le tu'ugamau. O le aso fo'i lea ua tā'ua o le aso fanau o le ekalesia. O le afio ifo la o le Agaga Paia, na vaaia le laulaufaiva peisei o le afi ua vaevaeina, na afua ai ona tautala i le gagana eseese. O le malosia ua latou maua e fa'auau ai le galuega tala'i. E manatu nisi ua onanā nei tagata ina ua tautala i gagana eseese, ae leai o lo'o tautala lava le tagata ia, i lana lava gagana.

GALUEGA FA'ATINO:

- 1 – Ia manino le faitau a le fanau i le Tusi Paia
- 2 – Fa'amalamalama upu e le o malamalama ai
- 3 – Fai ni au fesili e tusa o le mataupu
- 4 – Fa'asoa mai le vasega i tusa o le lesona

A'OA'OGA:

- Fa'amoemoe i le Atua ma lona mana tatou te mafaia ai mea uma
- Ia tatou talia le fesoasoani mai o le Agaga Paia

PESE: This little light of mine, I'm gonna let it shine.

ASO SA: IUNI 15, 2025

MATAUPU: O LE TAMA ALOFA

TUSI FAITAU: LUKA 15:20

SINI: IA ILOA E TAMAITI FA'ATAUA LENEI ASO SA MO LONA TAMA, MA IA ILOA E FA'APENA FO'I LE ALOFA O LE ATUA I TAGATA UMA.

FESOASOANI MO LE FAIAOGA:

Fa'afetai tele mo le galuega ma ia maua pea le Agaga mafuta mai o le Atua e ala i lau auauna atu i le a'oa'oina o lana fanau i le Tusi Paia. Ia tapena lelei pea mo le Aso Sa ma le lesona ina ia maua lava se malamalamaaga o le vasega e tusa o mataupu o lea Aso Sa ma lea Aso Sa. Ia fa'atasi pea le Atua ma oe i le galuega.

FESOSOANI MO LE MATAUPU:

O se vaaiga e ofo tele ai pe a manatu i le taimi na toe fo'i atu ai le ui'i fa'amaumauōa. O le atali'i na alu e fai lona loto, ua fia alu ese ma le aiga, ae se'i alu e ēva ma ana uō oi le lalolagi. Ua uma ana mea uma sa alu ma ia, ua sōsola fo'i ana uō. Ua ia manatu e sili ai lava le aiga moni.

Na alu ma toe fo'i atu i lona tamā ma le salamo moni, auā ua mativa ua leai se mea. Ua iloa mamao mai o ia e lona tamā, ae na ia le fa'atali, ae momo'e vave atu loa, ua sogi ma fusi ia te ia, auā ua mutimutivale lava lona alofa i lona lava atali'i ua leva ona alu ese ma le aiga.

GALUEGA FA'ATINO:

- 1 – Ia fa'amanatu le tāua o le Aso Sa o tamā
- 2 – Fa'amalamalama ni upu o le tusi faitau.
- 3- Fa'asoa pea i le uiga ma le matāfaioi a le tamā i totonu o le aiga.
- 4 – Fa'ailoa i ai lo tatou Tamā e sili, o le Atua lea.

A'OA'OGA:

- Ia tatou alolofa i o tatou tama.
- Ia ava ma usiusita'i i o tatou tama.
- Aua le faia o ta loto, ae fai le mea e mana oi ai le tama.

PESE : Faalogo ma usitai e leai se isi ala

ASO SA: IUNI 22, 2025

MATAUPU: FA'AMANATU

O le a tu'uina atu lava i lau susuga ni fesili o lenei Aso Sa mulimuli o lenei foi kuata a'oga. Ae o le avanoa fo'i lea e momoli atu ai le agaga fa'afetai e tusa o le galuega sa feagai ai. Malo le taupati malo fo'i le fa'amalolosi. O lo'o silafaga pea le Atua i galuega ua mae'a ona fai, ae faimai lava le fai Salamo, "aua ne'i ia te'i matou le Ali'i e, a ia tu'uina atu le viiga ia te ia." Manuia tele le malologa o lenei fo'i vaiseuga o le tausaga aoga.

Ia fa'amanatu i le vasega mataupu o lenei masina, po'o se a lava se mea o latou manatua mai i lenei tausaga aoga. O le fa'anaunau lava ia latou fiafia pea i tala o le Tusi Paia auā lo latou tuputupu a'e. E lē gata la i lena, a ia si'isi'i i luga le lelei o le faitauina o le tusi paia. Ia faailoa i le fanau o le aso Sa mulimuli lenei o le aoga, o le a toe a'e i le masina o Aokuso.

PESE: I'M IN THE LORD'S ARMY

IA A'OA'O MA LE PESE LEA MO MEAAI PO'O MEA TAUMAFI (PESE 320)

MALIE PULE LE TAMA E,

UA MATOU MAUA AI MEA LELEI

O OE IA MATOU FIAFIA AI

A'O TUMAU LE OLA NEI